

Na unanim da la pbd grischuna per No-Billag

Parolas da la pbd grischuna per las votaziuns federalas

■ (mc) **Delegadas e delegads da la pbd grischuna han prendì dacurt cun tutta evidenza la parola «na» per l'iniziativa No-Billag ed è sa mussada trumpada da la parola da la pps che fetschia donn al chantun Grischun cun sia varietad culturala ed a l'economia dals chantuns muntagnards.** «Il mez è il center e na dastga betg vegnir indebli», ha *Beno Niggli*, il viceparsura da la pbd grischuna, accentuà al cumenzament da la radunanza bain frequentada a Domat, «pertge il Grischun na dastga betg daven- tar il bal da gieu tranter sanester e dretg», uschia Niggli. La via cuminaivla cun il cumpromiss il meglier pussaivel haja purtà bainstanza a noss pajais. Da quai stoppia vegnir tegnì quint, era sche la posiziun tranter las fronts na saja betg adina simpla. Tuttina ha accentuà Niggli en sia allocuziun da bainvegna: La Partida burgaisdemocratica na stettia ni per sanester ni per dretg. Ella saja orientada vers l'avegnir tras il progress burgais. Cun quest motto haja la pbd era gi success en il passà. Uschia haja la populaziun suandà per passa 80 pertschient las parolas da la pbd. Cun quai tutgia la pbd tar il timun da las partidas che correspundian a la tenuta da la gronda part da la popula- zion.

Surpigliar responsabladad en la regenza

Uschia haja la pbd era surpiglià respon- sabladad en il ravugl da la regenza grischuna. *Barbara Janom Steiner* e *Jon Domenic Parolini* hajan cuntanschì ils ul-

tims onns fitg bler en favur dal chantun. La situaziun finanziaria dal chantun saja legraivla e sin l'areal da l'anteriura resgia industrialia a Domat dettia uss numerus novs posts da lavur. La politica economica ch'è vegnida dirigida en il Grischun essenziainmain entras la pbd dastgia sa mus- sar, uschia Niggli. «Lain s'engaschar cun vigur che questa influenza en favur d'in chantun attractiv restia vinavant e vegnia er rinforzada.»

Cler na a No-Billag

En la discussiun al podi moderada da *Stephan Kaufmann* han il candidat da la pbd per la regenza grischuna, deputà *Andreas Felix*, il deputà *Jan Koch* da la pps e com- member da la giunta da l'Uniun grischu- na da mastergn ed il mainagestiu da me- dias tar Somedia *Silvio Lebrument* defen- di lur posiziuns. Ils arguments da Koch ch'è era s'engaschà intensivamain tar l'Uniun grischuna da mastergn per in gea n'ha betg pudì persvader la radunanza da la pbd grischuna. «La posiziun da Koch e da la pps grischuna è dominada da la tenuta da la partida-mamma e resguarda ils interess da las aglomeraziuns enstagl quella da noss chantun muntagnard. Questa tenuta na corresponda betg als interess da l'economia grischuna e da la varietad culturala da noss chantun», ha punctuà il candidat per la regenza *Andreas Felix*.

Delegadas e delegads èn suandads unanimamain sia recumandaziun da decider la parola na per questa iniziati- va.

Gea a l'Urden da finanzas 2021

Ils delegads da la pbd grischuna han pli- navant sustegnì il nov urden da finanzas sin plaun federal ch'è vegnì preschentà da cusseglier guvernativ *Jon Domenic Parolini*. Cun il nov Urden da finanzas 2021 vegn il sistem cumprovà da la taxaziun da taglia manà vinavant. Quel na porta nagi-

nas ulteriuras grevezas per la populaziun. Era vegn la populaziun ad avair 2035 in'ulteriura giada la pussaivladad da deci- der davart la cuntinuaziun da quest urden.

Parolini ha rendì attent al fatg che sche la midada proponida da la constitu- zion na vegniss betg acceptada mancasi- an duas terzas da las entradas da la con-

federaziun. La confederaziun fissia en in- tal cas necessitada u da reducir las expen- sas per 60 pertschient u d'auzar las tag- lias. Tuts dus na saja betg opportun, ha punctuà Parolini concludend.

Delegadas e delegads han prendì una- nimamain la parola gea per quest project federal.



Podi davart la No-Billag da la pbd dal Grischun: *Andreas Felix, Silvio Lebrument, Stephan Kaufmann e Jan Koch (da san.)*. FOTO TH. GSTÖHL